

Uunga siunnersuut: Akiliisarfik Ilanngaassivik pillugu Inatsisartut inatsisaata**atorunnaarsinnejnarnera pillugu Inatsisartut inatsisaat.**

(Aningaasaqarnermut Naligiissitaanermullu Naalakkersuisoq)

Akissuteqaat

(Aningaasaqarnermut Naligiissitaanermullu Naalakkersuisoq)

Aappassaaneerinninneq

Aallaqqaammut Naalakkersuisut sinnerlugit Aningaasaqarnermut Akileraartarnermullu Ataatsimiititaliap isumaliutissiussiorluni sukumiisumik sulisimaneranik ataatsimiititaliaq qutsavigaara.

Ataatsimiititaliami amerlanerussuteqartut siunnersuutip akuerineqarnissaa inassutigigaat Naalakkersuisut maluginiarpaat.

Innuttaasut pisortanut akiitsui Ataatsimiititaliap isumaliutissiissummini sammivai. Tassunga atatillugu akitsoqartut akileerusussusaata akiliisinnassusiatlu isumaliutiginissaa pisariaqartoq ataatsimiititaliap tikkuarpaa, akitsoqartullu akiliisinnassuseqartut annertunerusumik akiitsuminnik pisortanut akiliisarnissaasa pisariaqarnera, ataatsimiititaliap erseqqissaatigaa. Naalakkersuisut tamanna isumaqtigaa.

Ataatsimiinnermi uani suliffissarsiornermi ikorsiissutit pisortanillu ikiorserneqartarnermut inatsisissatut siunnersuutit pisortanut akiitsunik annertunerulersitsinissaat aarlerinaateqarnersoq, ataatsimiititaliap isumaliutissiissummi ilanngullugu isumaliutigaa. Ikorsiissutinut annertussusileriikkant ikaarsaarnermi, innuttaasut pissarsiaminik nammineerluni aqutsisussangornerani kommunit innuttaasup akiligassaanik akiliisarneranik maanna aaqqissuussinermit amerlanernik akitsoqartoqalernissaa ataatsimiititaliap aarleqqutigaa. Tassunga atatillugu ikorsiissutit annertussusileriikkat akiitsunik akiliisitsisarnermik imminermini pitsannguutaannginnissaa ataatsimiititaliap nalilerpaa, tamannali akiliisinnassutsimik pitsannguissagunartoq, taamaalliluni aallaqqaammut akiitsunittoqartassanngitsoq, ataatsimiititaliaq naliliivoq. Naalakkersuisut ataatsimiititaliaq isumaqtigaa. Ikorsiissutinik pisartagallip aningaasaqarnini nammineq aqussagaa siunertarineqarpoq. Taamaammat innuttaasup aningaasaqarnini nammineq aqussagaa aallaavigneqarpoq, kommunilli innuttaasup aningaasaqarnermut pisussaaffii suli aqussinnaavai, innuttaasup akitsoqarnermi pisussaaffini naammassisinnaanngippagit.

Ataatsimiititaliap atortussat allat pisortanut akiitsut annikillisarnissaannut piukkunnaateqarsinnaasut ilanngullugit isumaliutigaat.

Ataatsimulli isigalugu akiliisitsiniarnerinnakkut akiitsut annertusiartornerisa killup tungaanut saatinneqarsinnaanerat ilimanangilluinartoq Naalakkersuisut tassunga atatillugu oqaatigissavaat. Tamanna ilaatigut akiliisitsiniartarnermi inatsimmi eqqartuussiviillu ingerlanneqarnerat pillugu inatsimmi inatsisit killiliinerisa malitsigaat. Ilanngullugulu innuttaasut amerlavallaat akiliisinnassuseqavinqinnerisa aamma malitsigaat.

Ataatsimiititaliap isumaliutissiissutaata siunnersuutillu siullermeerneqarnerani oqallinnerup akiitsut akiitsunillu akiliisitsiniartarnerup arlalinnik kalluuffeqartoq, ilaatigut isumaginninnermut immikkoortumut, annertuumik ajornartorsiutaasoq erseqqissumik takutippaa. Tassunga atatillugu akiitsunik siunnersuisarneq, ilaatigut innuttaasunik missingersuusiortarnermik ikuinikkut akiitsuninnissamik pinaveersimatitsisinnaasutut atortussatut pingaaruteqartuuvoq. Akiitsunik siunnersuineq innuttaasunut ataasiakkaanut inuiaqtiginnullu tamarmiusunut iluaqutaasunngorlugu sulinissamut ikorfartuisunngorlugu nalimmassarneqassasoq Naalakkersuisut kissaatigaat.

Ungasinnerusoq isigalugu akiitsut akiitsunillu akilersuititsineq pillugu nassuaatip 2017-imeersup nutarternissaata isumaliutiginissaanik Aningaasaqarnermut Akileraartarnermullu Ataatsimiititaliap kaammattuuta, Naalakkersuisut tusaatissatut tigoruspappaat.

Taama oqaaseqarlunga Naalakkersuisut sinnerlugit siunnersuut maana taamatut iluseqarluni pingajussaaneerinninnissamut ingerlaqqissasoq inassutigaara.